

東

庵

集



# 東庵集

四庫全書珍本初集

集部  
別集類

詳校官中書臣徐志晉

侍讀臣孫球覆勘

欽定四庫全書

集部五

提要

東菴集四卷

別集類四元

臣等謹案東菴集四卷元滕安上撰安上字仲禮定州人以薦除中山府教授歷禹城主簿徵為國子博士轉太常丞拜監察御史以地震上疏不得達遂引疾去尋起為國子司業卒於官元史不為立傳其事實具見於姚

燧所作墓碣銘且稱其敏脩篤行學積其躬  
道行其家化及其鄉而吳澄文正集亦謂安  
上為人乃有學有行而有文者蓋亦東脩自  
好之士也燧又稱所著有東菴類藁十五卷  
江西廉訪使趙秉政板之行世又有易解洗  
心管見藏於家而焦竑國史經籍志乃稱安  
上東菴稿十六卷與燧所紀卷數不合當由  
未見原集而誤近時顧嗣立作元詩選搜採

至數百家而安上之集闕焉則其佚久矣今  
從永樂大典中裒集編次得詩二百餘篇分  
為四卷其詩格以樸勁為主不免稍失之麤  
獷而筆力健舉七言古詩尤有開闔排宕之  
致視元末穠豔纖媚之格全類詩餘者又不  
以彼易此矣考蘇天爵文類載有安上祭硯  
司業先生文一篇而姚燧亦謂其文一本理  
義辭旨暢達不為險譎非有裨世教者不言

是原集當兼載詩文惜永樂大典僅存其詩  
其文已無可考也乾隆四十六年九月恭校

上

總纂官

臣紀昀

陸錫熊

孫士毅

總校官

臣陸費墀

欽定四庫全書

東庵集卷一

元 滕安上 撰

四言詩

至元德音詩

并序

至元十九年四月十八日中山府儒學教授臣某從  
庶官之後伏聽德音條凡十五每讀一訖咸以手加  
額踴躍歡抃如獲更生既而使臣孫某徵詩某職在  
儒學不敢以蹇淺辭竊惟明世不能無佞而能去佞

聖人不難得民而難安民和萬邦而黎民時雍去四  
罪而天下咸服此堯舜所以為堯舜也惟聖朝接千  
歲之統惟皇帝大四海之圖去奸佞擢賢良下詔條  
安百姓天地之仁推之而愈宏日月之光廓之而愈  
明於戲休哉誠登堯而軌舜也太平之期臣幸親見  
謹拜手稽首而為之詩

溫溫德音敷于下土癯老黎庶是蹈是舞德音惟何天  
子神聖奸讒蒙蔽咸革而正讒人罔極竊弄威福負且

乘器凶以覆餗林甫剖棺弘羊既烹百僚稽首天子之  
明乃命元老載謀載惟有積其弊以新以釐命相選賢  
允協帝心鰥寡無蓋式昭德音好事箕歛民多逋畝天  
子憐之賞租已負奸事羅織民罹慘酷天子憐之省刑  
綏獄養老恤孤和鈞平價次第舉行彰我王化琴瑟不  
調解而更張四海熙熙躋于一堂惟我天子萬壽無疆  
皇皇有元古無比隆浸以唐德扇以虞風惟我天子垂  
祚無窮地平天成風恬俗熙臣今何幸乃親見之拜手

稽首獻此頌詩

五言古

晨起

樹色暗瞳矐雞聲動棲鳥浮雲澹流水時見衆星小虛襟顥氣盈獨立萬物表詩成望東方陽輝破清曉

擬行行重行行

行行重行行溪邊草離離是時新雨霽浩碧無津涯中州有佳人音問兩不知我欲駕風濤恨無青竹枝舟行恨

波緩汴流愈云遠思君重思君詎作乘興返感彼芙蓉  
衰嘆此歲已晚君家有雕胡為我炊一飯

擬青青陵上柏

青青陵上柏坦坦溪側石為問釣魚人曾見行吟客我  
家有斗酒雖濁未為薄向在聲利中釀法得京洛荆布  
為我熟待予不時索幸君共一觴同此泛家宅漁人如  
不聞絲綸整千尺回舟入風烟可望不可迫

擬今日良宴會

今日良宴會溪山入橫陳非絲亦非竹足以怡心神座  
中有佳人冰雪含天真霞衣風杲杲紉蘭佩申申莫惜  
此夕樂但恐此迹陳君看牛與女遠隔銀河津雖有七  
夕期終歲長悲辛

題贈禹城紀敬叔

紀侯大去國聖筆示甄獎後昆炳遷史風義愈森爽迄  
今雲初孫孝弟甲鄉黨仍以貲筭高推擇掌內帑金錢  
富漢文貫朽不可緼手目無權衡鈞石校銖兩寵監平

原稅去家間尋丈孰云弗為政足佐一邑長可以得雋  
彥可以抑貪枉瑣瑣龍斷夫貨利左右罔為當痛繩檢  
使泚發諸額百里昔隱市干木屈大駟為當重拂拭庸  
受進賢賞除租免農器良務農業廣又當潤澤之力本  
遂均養朱邑一嗇夫桐鄉尚祠饗職豈繫崇卑遺愛即  
慕仰春風徧山東浩歌歸擊壤

稅司除蠶征為賦

周官設司市蓋抑商夫貪法每優農人俾治畝東南漢

末事筦權利孔開窮探黠商操奇贏疲氓困鑄鑿蠶絲  
至縑帛一甚矧再三孰憐始作俑迤邐及卵蠶古人樂  
仁術肄業慎矢函嘗逢鶴髮翁典故云飽諳鉉基與經  
籍不與百貨叅迄今用其一無乃異苦甘聖朝化更張  
治古無人慙錢穀靳高選秩重伯子男有來兩君子勿  
疑朋盍簪張侯嗜理學語孟入泳涵末得張潤甫家世  
青出藍安坐一務中心迹如禪庵首罷卵蠶稅喜氣騰  
晴嵐昨間日中市珠褚盈負擔萬家鳴機杼衣易懸鶉

鶴遐想挾纊人禱頌將何堪  
鎡基倘隨例悠久播美談

辛巳九日張居實坐中挿籠金菊索詩賦此

菊花如隱人東籬  
遂幽屏黃裳信元吉  
中美恐彪炳鮮  
鮮絳繒衣衣錦復尚綢  
相對淡以文  
晚節愈閒靜  
老鬢不堪揶揄  
盃照疎影淵明今已矣  
芳盟復誰領  
長吟思悠然  
娟娟風露冷

題鈍軒祖墳遺安亭

燕山屹坡陀喬木參秋旻  
高亭表遺安八世趙氏墳  
時時